

आकाशवाणी

खबरां ----

1. प्रधानमंत्री नरेंद्र मोदी होरें राश्ट्रीय हल्दी बोर्ड दे गठन दी सराहना कीती ऐ।
2. प्रधानमंत्री नरेंद्र मोदी होरें भारती मौसम विभाग दे 150में स्थापना दिस दे मौके पर भारत गी हर मौसम लेई तैयार करने ते जलवायु स्मार्ट बनाने लेई मिशन मौसम दा उद्घाटन कीता।
3. रक्षा मंत्री होरें आखेआ जे सेना दे बलिदान राश्ट्र दी सुरक्षा करदे न, जम्मू-कश्मीर पाक अधीकृत कश्मीर बिजन अधूरा ऐ, अखनूर जम्मू च मनाया गेआ साबका सैनिक दिवसा।
4. जम्मू-कश्मीर कब्जा रेखा कन्नै लगदे राजौरी जिले च इक बरूदी सुरंगै दे फट्टने करी सेना दे 6 जोआन घायल होई गे।
5. प्रयागराज च अज्ज मकर संक्रांति दौरान त्रिवेणी संगम च पवित्र श्रान करने आहले श्रद्धालुएं दी गिनतरी नै 3 करोड़ 50 लक्ख दा आंकड़ा कीता पार।
6. भारती महिला टीम खो-खो विश्व कप 2025 दे पैहले मैच तैहत अज्ज नमीं दिल्ली च इंदिरा गांधी इंडोर स्टेडियम च दक्खनी कोरिया कन्नै मैच खेड्ढोग।



PM-NTD

प्रधानमंत्री नरेंद्र मोदी होरें राश्ट्रीय हल्दी बोर्ड दे गठन दी सराहना कीती ऐ। सोशल मीडिया पर अपनी इक पोस्ट च प्रधानमंत्री होरें आखेआ जे एह इक्क बड्डी खुशी आहली गल्ल ऐ, विशेष करियै देसै दे मेहनती हल्दी उत्पादन करने आहले करसानें लेई। उनें भरोसा दोआया जे इस बोर्ड दे गठन कन्नै बसारै दे उत्पादन च बादा विकास होग। विश्व सतह पर एहदी पहुंच बधोग-सप्लाई चेन तगड़ी होग जेदे नै उपभोक्ताएं ते करसानें गी बड़ा मता फायदा पुज्जोग।



PM-Mission Mousam

प्रधानमंत्री नरेंद्र मोदी होरें देश गी हर चाल्ली दी आबोहवा च कुसै बी किस्मै दी मौसमी चुनौती दा मुकाबला करने च सक्षम ते कुशल बनाने लेई मिशन मौसम दी अज्ज मौसम मैहकमे दे 150में स्थापना दिवस दे मौके पर शुरूआत कीती। इस मौके पर बोलदे होई प्रधानमंत्री नरेंद्र मोदी होरें आखेआ जे मिशन मौसम भारत दे उस धेइयै दा सबूत ऐ जेदे राहें ओह इक्क मजबूत ते भविक्ख आस्तै तैयार राश्ट्र दा निर्माण करोग। मौसम विभाग दी विश्वसनीयता पैहलें थमां बड़ी मती बधी ऐ। भविक्ख च भारत मौसम दी हर परिस्थिति कन्नै निब्बड़ने लेई तैयार रवै, इक क्लाइमेट स्मार्ट देश बनै, मिशन मौसम, सतत भविक्ख ते फ्यूचर रैडीनेस गी लेइयै भारत दी प्रतिबद्धता दा बी प्रतीक ऐ। प्रधानमंत्री होरें

भारती मौसम विभाग दी डेढ सौ साल दी जात्तरा दी सराहना करदे होई इसी देसै च आधुनिक विज्ञान ते प्रौद्योगिकी दा इक गौरवशाली ध्याय दस्सेआ।

<><><><><><>

Defence-Minister

रक्षामंत्री राजनाथ सिंह होरें सेना दे जवानें दे बलिदानें दी सराहना करदे होई इस गल्ल पर जोर दिंदे होई आखेआ जे देश दा उग्रवाद कोला बचाऽ करने आस्तै उंदी बड़ी बड्डी भूमिका ऐ। भारती फौज पासेआ पूर्व सैनिकें दी अखनूर च आयोजित इक रैली गी संबोधित करदे होई रक्षा मंत्री होरें आखेआ जे फौज दे जवान देश गी उग्रवाद कोला बचाने लेई अपनी जानें दा बलिदान देआ करदे ना। राजनाथ सिंह होरें जोर दिंदे होई आखेआ जे पाकिस्तान आहले कब्जे आहले जम्मू-कश्मीर दे बगैर जम्मू-कश्मीर अधूरा ऐ। राजनाथ सिंह होरें साबका फौजियें दी बहादुरी दी सराहना करदे होई आखेआ जे स्हाढे सुरक्षाबलें दुश्मनं गी लड़ाइयें च लगातार हराइए स्हाढे देश दी रक्षा कीती ऐ। इस मौके पर रक्षा मंत्री होरें अखनूर हैरीटेज म्यूजियम दा उद्घाटन बी कीता।

<><><><><><>

PM-Veterans

प्रधानमंत्री नरेंद्र मोदी होरें अज्ज सशस्त्र बल साबका सैनिक दिवस पर साबका फौजिएं दे प्रति आभार प्रगट कीता ऐ। अपनी इक सोशल मीडिया पोस्ट च प्रधानमंत्री होरें उनें शहीदें गी श्रद्धांजलि भेंट कीती जिनें देसै दी राखी करदे होई अपना जीवन समर्पित कीता। श्री मोदी होरें उनेंगी देश प्रेम दे प्रतीक ते नायक आखेआ। श्री मोदी होरें दस्सेआ जे सरकार नै म्हेशां साबका फौजिएं दे कल्याण लेई कम्म कीता ऐ ते भरोसा दोआया जे

सरकार इस चाल्ली दियां पैहलकदमियां भविक्ख च बी जारी रक्खोग। सशस्त्र बल साबका सैनिक दिवस हर बरै साबका फौजिएं आसेआ मुल्लै दे नमित दित्ती गेदिएं सेवाएं लेई उंदा सम्मान प्रगट करने लेई मनाया जंदा ऐ।

<><><><><><>

CM-Veterans Day

जम्मू-कश्मीर दे मुखमंत्री उमर अब्दुल्ला होरें आखेआ ऐ जे सरकार सुरक्षाबलें दे कल्याण लेई बचनबद्ध ऐ। अखनूर च Armed Forces Veterans दिवस दे मौके पर इक कार्जक्रम दे दौरान साबका फौजियें ते उंदे परिवारें दे कट्ट गी संबोधित करदे होई मुखमंत्री होरें उनेंगी यकीन दलाया जे सरकार उन्दे कल्याण आस्तै प्रतिबद्ध ऐ।

<><><><><><>

Soldier Injured

राजौरी जिले च कब्जा रेखा कोल होए दे इक चानचक्क धमाके च घट्ट कोला घट्ट 6 फौजी जवान घायल होई गेन। स्हाढे संवाददाता मूजब इक फौजी दस्ता अपनी नियमित गश्त दौरान बारूदी सुरंग दी चपेट च आई गेआ जेदे चलदे एह हादसा होआ। एह चानचक्क आह्ला धमाका राजौरी जिले च नौशेरा इलाके दे भवानी सेक्टर दे मकड़ी इलाके च होआ ऐ। घायल जवानें गी 150 जनरल अस्पताल राजौरी च भर्ती करवाया गेआ ऐ ते उत्थे उंदा इलाज चला करदा ऐ। सब्भनें घायल जवानें गी मामूली चोटं आई दियां न ते उंदी हालत स्थिर बनी दी ऐ।

<><><><><><>

Pariksha Pe Charcha

प्रधानमंत्री नरेंद्र मोदी हुंदे नै इस बरै परीक्षा पे चर्चा दौरान गल्ल-कत्ति लेई 3 करोड़ 25 लक्ख विद्यार्थिं उन्दे माता पिता ते शिक्षकें अपना पंजीकरण करोआया ऐ। केंद्री शिखा मंत्रालय मूजब परीक्षा पे चर्चा इक चाल्ली दी राष्ट्रव्यापी मुहिम बनी गेई ऐ। पंजीकरण कराने आहलें च किश विदेशी विद्यार्थी बी ऐन जेदे नै एह बांदै होंदा ऐ जे परीखा पे चर्चा गी हून वैश्विक सतह पर बी पसिंद कीता जा'रदा ऐ। एहदे गितै पंजीकरण जेड़ा 14 दिसंबर 2024 गी शुरू होआ हा अज्ज सम्पन्न होआ'रदा ऐ। अजें बी mygov.in पर इच्छुक अपना पंजीकरण कराई सकदे ना।

<><><><><><>

EAM-Spain

विदेश मंत्री डॉ. एस सुब्रहमण्यम होरें आखेआ ऐ जे दुनिया च बदधी वैश्विक साख ते चुनौतीपूर्ण समें च सार्थक सहायता प्रदान करने दी भारत च अनूठी समर्थ ऐ। डॉ. जयशंकर होरें स्पेन च प्रवासी भारतीयें गी संबोधित करदे होई वैश्विक मंच पर भारत दे सबका साथ सबका विकास ते सबका विश्वास दे दृष्टिकोण पर जोर पाया। अज्ज नेह मुल्ल बड़े घट्ट न जेड़े रूस-यूक्रेन जां इजरायल इरान जनेह मुल्ले कन्नै गल्ल करने दी स्थिति च न, पर प्रधानमंत्री नरेंद्र मोदी इस स्थिति च न जे ओह इनें मुल्ले कन्नै गल्ल करी सकदे ना। इस्सै चाल्ली बड़े घट्ट मुल्ल न जेड़े क्वाड ते ब्रिक्स दौनें समूहें दे सदस्य ना। एह अपने आपै च बड़ी अनौखी गल्ल ऐ। अज्जै दा विश्व धुरवीकरण आहला विश्व ऐ। इस मंजर च भारत गै ओह मुल्ल ऐ जेड़ा सबका साथ, सबका विकास सबका विश्वास गी दुनिया तक्कर पजाई

सकदा ऐ। डॉ. जयशंकर होरें भारत-स्पेन सरबंधें गी सार्थक दस्सेआ ते आखेआ जे दवें मुल्लख किट्टे रलियै महत्वै आहले तरीके नै अगगे बदा'रदे ना।

<><><><><><>

Coal-Imports

भारत आसेआ गुणवत्ता आहले कोयले दा आयात इस माली बरे दे पैहले 7एं म्हीनें-अप्रैल थमां अक्तूबर तगर 3 प्रतिशत थमां बी मता घटियै 149 मिलियन टन रेई गेआ ऐ जेहका पिछले बरे इस्सै अरसे च 154 मिलियन टन हा। एहू जानकारी कोयला मंत्रालय आसेआ दिती गेई। मंत्रालय नै दस्सेआ जे कोयला सेक्टर तेजिया नै बधा'रदी अर्थ बवस्था दा सहयोग करने च इक महत्वै आहली भूमिका निभा'रदा ऐ। मंत्रालय नै दस्सेआ ऐ जे मुल्लखे च कोयले दी मंग ते उपलब्धता बश्कार आहली बित्थ पूरने लेई कोयले दा आयात लाजमी ऐ। एहदे नै स्टील उत्पादन जनेह महत्वै आहले कारखानें दी मदाद कीती जंदी ऐ। मंत्रालय नै दस्सेआ जे कोयले दे आयात च कमी करने ते उर्जा संरक्षण लेई मुल्लखे च अपना कोयला उत्पादन बदाने ते इक स्थायी कोयला सप्लाई यकीनी करने लेई निगगर कदम पुट्टे जा'रदे ना।

<><><><><><>

Rajouri-Deaths

सरकारी मैडिकल कालेज जम्मू च इक होर न्याणे ते जीएमसी राजौरी च इक बर्जुग दी मौत होई जाने कन्नै राजौरी दे कोटरंका दी बुद्धल तैहसील दे गडाहल गांस च कुसा

संदिग्ध अनजान बमारी कारण मरने आलें दी गिनतरी 12 पुज्जी गई ऐ। बुद्धल च बने दे हालातें गी दिक्खदे होई डिप्टी कमीशनर राजौरी अभिशोक शर्मा होरें जाति तौर पर स्थिति पर तक्क रखी दी ऐ। सेहत मंत्री स्कीना इत्तू होरें भरोसा दोआया ऐ जे इस सरबंधे च जांच कीती जा र दी ऐ ते मैडिकल टीमें गी कम्मे पर लाया गेदा ऐ।



Rajouri Deaths

सरकारी मैडिकल कालेज जम्मू च इक होर न्याणे ते जीएमसी राजौरी च इक बर्जुग दी मौत होई जाने कन्नै राजौरी दे कोटरंका दी बुद्धल तैहसील दे गडाहल ग्रंs च कुसा संदिग्ध अनजान बमारी कारण मरने आलें दी गिनतरी 12 पुज्जी गई ऐ। बुद्धल च बने दे हालातें गी दिक्खदे होई डिप्टी कमीशनर राजौरी अभिशोक शर्मा होरें जाति तौर पर स्थिति पर तक्क रखी दी ऐ। ए.डी.सी. कोटरंका दिलमीर होरें प्रभावत इलाके दा दौरा लाया। जिला प्रशासन दे हिदायतें हेठ सेहत विभाग दी टीमां संपर्क च आए दे लोकें दी पडताल ते सैंपल किट्टे करने दे कम्मै च तेजी कन्नै लग्गी दियां न। कुल 272 सैंपल लेई लैते गे'न। ध्यानजोग ऐ जे जरूरी बीएं दी आपूर्ति दी गुणवत्ता दा पता लाने आस्तै पैहले गै इस थाहरा थमां रूट्टी ते पानी दे सैंपल किट्टे करी लेते गे'न। सेहत विभाग दी इक टीम सेहत निदेशक जम्मू डॉ. राकेश मंगोत्रा ते मुख्क सेहत अधिकारी राजौरी डॉ. मनोहर राणा हुंदी दिक्ख-रिक्ख च कड़ी कोटरंका च गै रूकियै सरबंधत कम्म करा'रदी ऐ। प्रशासन नै कुसा बी आपातकालीन हालात कन्नै निबडने आस्तै मोबाइल मैडिकल इकाई

दा बी प्रबंध कीते दा ऐ। सेहत मंत्री स्कीना इत्तू होरें भरोसा दोआया ऐ जे इस सरबंधे च जांच कीती जा र दी ऐ ते मैडिकल टीमें गी कम्मे पर लाया गेदा ऐ।

<><><><><><>

PM

प्रधानमंत्री नरेंद्र मोदी होरें मकर संक्रांति दे मौके पर महाकुम्भ अमृत स्नान करने आहले श्रद्धालुएं गी मुबारकबाद दिती ऐ। सोशल मीडिया पर महाकुम्भ दे फोटू सांझा करदे होई श्री मोदी होरें महाकुम्भ गी लग्न ते आध्यात्मिकता दी सच्ची तस्वीर दस्सेआ। मकर संक्रांति पर अज्ज प्रयागराज च महाकुम्भ अमृत स्नान करने आहले श्रद्धालुएं दी गिनतरी साङ्खे 3 करोड़ दा आंकड़ा पार करी गेई।

<><><><><><>

Mahakumbh-Train Katra

उत्तरी रेलवे नै घोषणा कीती ऐ जे भारतीय रेलवे आसेआ श्री माता वैष्णो देवी कटड़ा ते प्रयागराज बश्कार महाकुम्भ 2025 दौरान त्रै विशेष रेल गड्डियां चलाइयां जाडन। पैहली रेल गड्डी श्री माता वैष्णा देवी कटड़ा थवां 24 जनवरी गी चलोग। अगलियां दो रेल गड्डियां 7 फरवरी ते 14 फरवरी गी चलडन। इनें विशेष रेल गड्डिएं दा मकसद लोकें गी सुचारू ढंगै सिर प्रयागराज पजाना ऐ। इस जत्त कन्नै उत्तरी रेलवे नै इस पवित्तर आयोजन च श्रद्धालुएं गी सेवा उपलब्ध करोआने दी अपनी बचनबद्धता गी फ्ही दोहराया ऐ।

<><><><><><>

Vaishno Devi Cave

अज्ज मक्कर संक्राति दे मौके पर श्री माता वैश्वो देवी जी दे दरबार च परानी गुफा गी श्रद्धालुएं लेई खोलेआ गेआ ऐ। अज्ज बडलै दी आरती दे बाद खोली गेदी एह परानी गुफा मेद ऐ जे कोई इक म्हीने तगर खुल्ली दी रौहग जां जिच्चर श्रद्धालुएं दा रश परतियै नेई बधी जंदा। ध्यानजोग ऐ जे हर ब'रे मककर संक्राति दे मौके पर इस प्राचीन गुफा गी श्रद्धालुएं लेई खोल्ली दित्ता जंदा ऐ। साल भर श्रद्धालुएं दे ीारी रश कारण एह गुफा बंद गै रचा जंदी ऐ ते हर श्रद्धालु गी एह चाह रौहदा ऐ जे उसी पुरानी गुफा चा लंघियै माता दे दरबार च मत्था टेकने दा मौका थोए। अज्जै कोला कोई 4-5 दहाके पैहले लोक इस्सै गुफा राएं ओंदे जंदे हे ते मगरा बधदे रश गी दिक्खदे होई नमिएं गुफाएं दा निर्माण कीता गेआ हा। श्री माता वैश्वो देवी श्राइन बोर्ड नै हाल च गै प्राचीन गुफा दे ऑनलाइन दर्शनें दी बी सुविधा शुरू कीती ही।



Makar Sankranti

मकर संक्रांति पोंगल बीहू ते उत्तरायण दे त्यौहार अज्ज पूरे देसै च बडे धार्मिक जोश ते जज्वे कन्नै मनाए जा रदे ना। एह त्यौहार फसल कटाई दे मौसम ते एकजुटता दी भावना दा प्रतीक ऐ। मकर संक्रांति पर लोकें देसै दिएं पवित्र नदिएं च स्नान कीता। मकर संक्रांति दे मौके पर हरिद्वार ते गंगा घाटें थमां लेइयै बागेश्वर ते उत्तरकाशी दे पवित्र स्थलें तगर आस्था दा जनसैलाब दिक्खने गी लब्भा। ज्हारां बद्दे भक्तें, गंगा स्नान करियै सूरज देवता गी अर्घ अर्पित कीता ते मंदरें च पूजा-अर्चना कीती। कुमाऊ इलाके दे बागेश्वर दे ऐतिहासिक उत्तरैणी मेले नै श्रद्धा, संस्कृति ते इतिहास दा अनोखा संगम पेश कीता।

उत्तरकाशी दे मणिकर्णिका घाट पर बी आस्था चरम पर लब्धी। उत्तराखंड च मकर संक्रांति दा एह पर्व छड़ा धार्मिक अनुष्ठान नेई सगुआं लोक संस्कृति ते परम्परा दा जीवंत प्रतीक ऐ। असम च माघ बिहू जां भोगाली बिहू पारम्परिक खुशी ते जोश कन्नै मनाया जारदा ऐ। गुजरात दे पच्छमी भारत दे दुए हिस्सें च गुड्डियें दा त्यौहार उत्तरायण पूरी खुशी ते जज्वे कन्नै मनाया जंदा ऐ।

<><><><><><>

Kho-Kho

भारती महिला टीम खो-खो विश्व कप 2025 तैहत अज्ज संझा दक्खन कोरिया कन्नै नमीं दिल्ली दे इंदिरा गांधी इंडोर स्टेडियम च मैच खेढोग। भारती टीम दी कप्तानी प्रियंका इंगले करा करदियां न। इसै चाल्ली मर्दे दी टीम दा मुकाबला अज्ज रातीं सवा अट्ट बजे ब्राजील कन्नै इसै स्टेडियम च होग। मर्दे दी खो-खो टीम नै कल पैहलें गै नेपाल गी हराइयै 42-37 दी जित्त दर्ज करी लैती दी ऐ।

<><><><><><>

Weather

मौसम विभाग नै अज्ज पंजाब, हरियाणा, चंडीगढ़, हिमाचल प्रदेश, ओडिशा ते उत्तर प्रदेश दे किश हिस्सें च रातीं ते सबेरे घना कोहरा छाए रौहने दी पेशनगोई कीती ऐ। अगले दो थमां त्रै दिनें तक्कर राजस्थान, बिहार, उत्तराखंड, उप हिमालयी, पच्छिम बंगाल, सिक्किम ते पूर्वोत्तर राज्यें च बी इसै चाल्ली दी स्थिति बने दे रौहने दे असार दस्से गेन। विभाग नै अज्ज अरुणाचल प्रदेश, असम, मेघालय, मेघालय, नागालैंड,

मणिपुर, मिजोरम ते त्रिपुरा च गरज दे कन्नै हल्की बरखा ते बिजली पौने दा बी अनुमान लाया ऐ। मौसम गी दिखदे होई मछुआरें गी अज्ज दक्खण श्रीलंका दे तटें ते दक्खन पूर्व ते औह्दे कन्नै लगदे दक्खन पच्छिम बंगाल दी खाड़ी च नेई जाने दी सलाह दिती गेई ऐ।

<><><><><><>